



Pertubuhan Ilmu
Kebajikan Dakwah
Malaysia

LAPORAN MISI PASCA BANJIR SUMATERA ACEH INDONESIA & MALAYSIA

Bireuen, Pidie Jaya, Aceh, Sumatera Indonesia & Malaysia

9 December 2025 - 10 Januari 2026



Pertubuhan Ilmu
Kebajikan Dakwah
Malaysia

PENGENALAN

Misi Bina Semula Harapan Aceh merupakan satu inisiatif kemanusiaan pasca bencana banjir yang telah dilaksanakan oleh PIKDM sebagai tanda solidariti, keprihatinan dan tanggungjawab sosial terhadap masyarakat yang terkesan di Aceh, Indonesia.

Bencana banjir yang melanda beberapa daerah di Aceh telah mengakibatkan kerosakan harta benda, menjejaskan keperluan asas, serta memberi kesan besar kepada kehidupan seharian penduduk setempat. Ramai keluarga terpaksa berhadapan dengan kesukaran untuk mendapatkan keperluan asas bagi meneruskan kehidupan pasca bencana.

Sehubungan itu, PIKDM dengan kerjasama rakan NGO tempatan, Asar Humanity, telah melaksanakan misi kemanusiaan ini bagi menyalurkan bantuan serta menyampaikan sokongan moral kepada komuniti terjejas.





Pertubuhan Ilmu
Kebajikan Dakwah
Malaysia

OBJEKTIF MISI

Antara objektif utama misi ini dilaksanakan adalah:

- **Membantu meringankan beban mangsa banjir melalui bantuan keperluan asas**
- **Menyokong pemulihan awal komuniti pasca bencana**
- **Mengukuhkan hubungan kerjasama strategik antara NGO Malaysia dan Indonesia**
- **Menyampaikan mesej keprihatinan dan ukhuwah kemanusiaan merentas sempadan**
- **Memberi sokongan moral dan emosi kepada mangsa bencana**





Pertubuhan Ilmu
Kebajikan Dakwah
Malaysia

KENAPA KAMI MEMBANTU MEREKA?

PIKDM percaya bahawa tanggungjawab kemanusiaan adalah satu amanah yang perlu digalas bersama tanpa mengira latar belakang dan sempadan negara.

Bantuan ini disalurkan berdasarkan beberapa faktor utama, antaranya:

- Keadaan penduduk yang kehilangan keperluan asas akibat banjir
- Keperluan mendesak untuk bantuan awal pasca bencana
- Nilai kemanusiaan, kebajikan dan ukhuwah Islamiah
- Keinginan untuk memastikan mangsa tidak berasa dilupakan

Misi ini menjadi bukti komitmen PIKDM dalam membantu golongan memerlukan, khususnya ketika mereka berada dalam keadaan paling mencabar.





Pertubuhan Ilmu
Kebajikan Dakwah
Malaysia

PELAKSANAAN MISI



Pelaksanaan misi dijalankan dengan kerjasama rapat bersama Asar Humanity selaku NGO tempatan yang berpengalaman dan memahami situasi serta keperluan penduduk setempat.

Antara aktiviti utama sepanjang misi ialah:

- **Penyelarasan agihan bantuan bersama relawan tempatan**
- **Agihan sumbangan keperluan asas kepada mangsa banjir**
- **Lawatan ke kawasan terjejas bagi melihat keadaan sebenar penduduk**
- **Sesi interaksi dan sokongan moral bersama komuniti setempat**

Kerjasama strategik ini memastikan kelancaran pelaksanaan misi serta ketelusan dalam penyampaian bantuan.



Pertubuhan Ilmu
Kebajikan Dakwah
Malaysia

ZIARAH KE RUMAH LAVENDER, PERLIS

Program ziarah ke Rumah Lavender, Kangar, Perlis telah dilaksanakan pada 31 Disember 2025 sebagai penutup rasmi aktiviti Pertubuhan Ilmu Kebajikan Dakwah Malaysia (PIKDM) bagi tahun 2025. Rumah Lavender merupakan sebuah rumah kebajikan yang menempatkan hampir 10 orang penghuni, majoritinya daripada golongan OKU cacat penglihatan serta berfungsi sebagai rumah transit ibu tunggal. Program ini turut diadakan bagi menzahirkan keprihatinan dan sokongan moral kepada pihak Rumah Lavender yang terjejas akibat kejadian banjir pada November 2025, yang telah menyebabkan kerosakan fizikal dan menjejaskan sebahagian operasi harian rumah kebajikan tersebut. Program ini berlangsung dari jam 5.00 petang hingga 6.30 petang dan diwakili oleh Ustaz Muhammad Izzat Che Husin sebagai wakil PIKDM.

Pelaksanaan program dimulakan dengan sesi ziarah dan ramah mesra bersama penghuni, diikuti dengan perkongsian ringkas serta bacaan doa bersama. Sebagai tanda sokongan dan keprihatinan, pihak PIKDM telah menyampaikan sumbangan pengenalan berjumlah RM1,000 berserta naskah zikir pagi dan petang kepada Pengerusi Rumah Lavender, Tuan Marja. Secara keseluruhannya, program ini telah memberikan kesan positif kepada penghuni dan pihak pengurusan Rumah Lavender serta mencerminkan komitmen berterusan PIKDM dalam menyantuni golongan yang memerlukan dengan penuh ihsan dan tanggungjawab sosial.





Pertubuhan Ilmu
Kebajikan Dakwah
Malaysia

AGIHAN AIR BERSIH (WATER TANK)

PIKDM telah melaksanakan agihan air bersih menggunakan dua (5) buah lori water tank di daerah Medan, Aceh Utara, Sumatera Utara, Bireuen dan Pidie Jaya di Aceh, sebagai sebahagian daripada usaha bantuan kemanusiaan pasca banjir. Seramai 1500 orang penerima manfaat telah menerima bekalan air bersih melalui agihan ini.

Agihan air bersih telah dilaksanakan secara rumah ke rumah, khususnya melibatkan kawasan pedalaman yang sukar mendapatkan sumber air bersih. Selain itu, bekalan air turut dihantarkan ke beberapa masjid dan surau yang memerlukan bagi kegunaan penduduk setempat. Pendekatan ini bertujuan memastikan air bersih dapat dimanfaatkan secara menyeluruh oleh komuniti yang terjejas.

Penduduk yang menerima bantuan ini melahirkan rasa syukur dan mengucapkan ribuan terima kasih kepada para penyumbang yang telah menyumbang bagi penyediaan air bersih kepada mereka. Air bersih tersebut amat diperlukan terutamanya untuk minuman dan penyediaan makanan, yang merupakan keperluan asas paling utama dalam situasi pasca bencana.

Dalam keadaan kekangan sumber, penduduk setempat amat berjimat cermat dalam penggunaan air bersih, memandangkan air bersih merupakan satu keperluan yang sangat berharga bagi mereka. Ketika dilanda bencana banjir, penduduk menghadapi kesukaran besar untuk mendapatkan bekalan air bersih, terutamanya di kawasan pedalaman yang terjejas teruk. Sehubungan itu, PIKDM telah mengenal pasti dan menumpukan agihan bantuan ke kawasan-kawasan yang paling memerlukan serta sukar diakses bagi memastikan bantuan sampai kepada golongan yang benar-benar terkesan.





Pertubuhan Ilmu
Kebajikan Dakwah
Malaysia

AGIHAN PEK MAKANAN (HOT MEALS)

Sebanyak 300 pek makanan siap dimakan telah diagihkan secara rumah ke rumah kepada penduduk terjejas banjir di Medan, Aceh Utara, Sumatera Utara, Bireuen dan Pidie Jaya. Pek makanan ini amat bermakna kepada penduduk yang sedang mengemas kediaman dan masih belum dapat memasak seperti biasa. Dalam keadaan serba kekurangan, menerima satu pek makanan untuk kegunaan sehari sudah cukup untuk mereka berasa bersyukur. Sepanjang agihan, pasukan misi turut berasa tersentuh apabila terdapat penduduk yang bertanya dengan penuh sopan sama ada masih terdapat lebihan pek makanan, dan bantuan tersebut segera disalurkan kepada mereka yang memerlukan.

Apa yang amat menginsafkan, tiada penduduk yang mengambil pek makanan secara berlebihan. Setiap penerima mengambil sekadar keperluan yang mencukupi untuk diri dan keluarga masing-masing. Alhamdulillah, PIKDM merakamkan setinggi-tinggi penghargaan dan ucapan terima kasih kepada para penyumbang yang telah menyumbang, sekali gus membantu meringankan beban dan memberi sinar harapan kepada komuniti yang terjejas.





Pertubuhan Ilmu
Kebajikan Dakwah
Malaysia

AGIHAN AIR MINUMAN

PIKDM telah melaksanakan agihan sebanyak 820 kotak air mineral kepada penduduk terjejas banjir di kawasan Medan, Aceh Utara, Sumatera Utara, Bireuen dan Pidie Jaya. Agihan ini bertujuan membantu memenuhi keperluan asas penduduk yang sedang berdepan dengan kekurangan sumber air bersih, khususnya untuk kegunaan minuman harian.

Penduduk setempat amat memerlukan air minuman bersih kerana kekangan mendapatkan sumber air yang selamat untuk diminum. Dalam keadaan tersebut, mereka terpaksa menggunakan air yang diterima daripada lori air bersih dan memasaknya semula sebelum boleh digunakan sebagai air minuman. Keadaan ini jelas menggambarkan betapa terhad dan berharganya sumber air bersih yang mereka miliki.

Air minuman merupakan satu keperluan yang amat bernilai bagi penduduk terjejas, memandangkan akses kepada sumber air bersih sangat sukar diperolehi. Sehubungan itu, agihan air mineral ini sedikit sebanyak telah membantu meringankan beban penduduk serta memastikan keperluan asas mereka dapat dipenuhi dalam tempoh pasca bencana.





Pertubuhan Ilmu
Kebajikan Dakwah
Malaysia

AGIHAN TILAM DAN SELIMUT

Dengan penuh rasa syukur, PIKDM telah menyalurkan sumbangan 20 unit tilam dan 20 helai selimut kepada pusat penjagaan anak yatim Darul Aitam, Meureudu, Pidie Jaya, Aceh. Sumbangan ini amat bermakna kerana kebanyakan tilam sedia ada rosak akibat banjir besar, sekali gus menjejaskan keselesaan dan keselamatan anak-anak yatim di pusat tersebut.

Ketika bencana melanda, mereka terpaksa berpindah dari tingkat dua ke bumbung masjid demi menyelamatkan diri apabila paras air terus meningkat. Dalam keadaan serba kekurangan, ruang tidur, dapur dan tempat makan terpaksa dikongsi. Alhamdulillah, hasil keikhlasan para penginfak, anak-anak yatim ini kini dapat berehat dan tidur dalam keadaan lebih bersih serta selesa dalam fasa pemulihan.

PIKDM merakamkan setinggi-tinggi penghargaan kepada para penginfak atas setiap sumbangan yang telah menjadi asbab kebaikan dan harapan buat mereka. Semoga Allah SWT membalas dengan ganjaran berlipat ganda, meluaskan rezeki serta memberkati setiap harta yang diinfakkan. Sekiranya terdapat rezeki dan dana tambahan pada masa akan datang, PIKDM berhasrat untuk meneruskan agihan bantuan di pusat ini, insya-Allah.



AKTIVITI MEWARNA , AGIHAN GULA GULA DAN SARUNG KAKI KEPADA GURU GURU SDIT AN NUR



Pertubuhan Ilmu
Kebajikan Dakwah
Malaysia

Pihak PIKDM telah mengambil peluang untuk menyantuni para pelajar di SDIT An Nur melalui aktiviti mewarna bertemakan “Aceh Kembali Pulih”. Aktiviti ini dilaksanakan sebagai usaha untuk mendekati anak-anak secara lebih dekat, di samping menceriakan mereka melalui aktiviti kreatif serta pemberian gula-gula sebagai sokongan moral dan tanda kasih sayang.

Walaupun sekolah mereka ditimpa musibah banjir yang sangat teruk, para pelajar tetap hadir ke sekolah darurat yang dibina sementara oleh pihak kerajaan, dan hadir ke sekolah pada setiap hari tanpa berputus asa. Sepanjang aktiviti berlangsung, anak-anak kelihatan sangat gembira dan teruja mewarnakan lukisan-lukisan yang disediakan. Walaupun masih berada dalam situasi pasca bencana dan berdepan kesan trauma, semangat mereka untuk terus hadir ke sekolah dan belajar amat membanggakan serta menyentuh hati pasukan misi.

Pasukan PIKDM turut bertanyakan kepada salah seorang guru mengenai kekuatan luar biasa yang ditunjukkan oleh anak-anak di sini. Jawapan ringkas namun penuh makna yang diberikan ialah, “Anak-anak di sini tiada yang menangis apabila diuji. Jadi kami sebagai guru perlu terus kuat seperti mereka.” Kebiasaannya anak-anak melihat kekuatan pada ibu bapa dan orang dewasa, namun di sini sebaliknya berlaku apabila ibu bapa serta para guru mengambil kekuatan daripada semangat dan ketabahan anak-anak ini. Masya-Allah, semoga melalui aktiviti ini anak-anak SDIT An Nur terus tersenyum, ceria dan bersemangat dalam meneruskan kehidupan serta pembelajaran mereka, insya-Allah.





Pertubuhan Ilmu
Kebajikan Dakwah
Malaysia

AKTIVITI GOTONG ROYONG

Aktiviti terakhir yang dilaksanakan oleh PIKDM dalam misi ini ialah gotong-royong pembersihan pasca banjir dengan melibatkan penggunaan sebuah jentera excavator bagi membantu pembersihan beberapa buah rumah di Kampung Geunteng, Meurah Dua, Pidie Jaya, Aceh. Aktiviti ini dijalankan sebagai sebahagian daripada usaha fasa pemulihan untuk membantu penduduk setempat membersihkan kediaman yang dipenuhi lumpur tebal akibat banjir.

Seramai 12 orang sukarelawan, bersama penduduk kampung dan pasukan PIKDM, telah terlibat secara langsung dalam aktiviti gotong-royong ini. Selain bantuan jentera, pasukan misi turut melakukan kerja pembersihan secara manual, termasuk mencangkul lumpur tebal yang mencecah paras bahu di bahagian rumah yang tidak dapat dimasuki oleh excavator. Lumpur terpaksa diangkut keluar dari dalam rumah secara berulang-alik, memerlukan tenaga yang besar serta semangat kerjasama yang tinggi.

Walaupun pembersihan berjaya dilakukan di beberapa lokasi, masih terdapat banyak rumah yang kekal dipenuhi lumpur dan sukar dibersihkan sepenuhnya. Kebanyakan penduduk tidak mampu menyewa jentera excavator berikutan kos sewaan yang tinggi. Sehubungan itu, penduduk setempat amat mengharapkan sokongan dan sumbangan daripada para penyumbang bagi penyediaan jentera excavator dalam fasa pemulihan ini. Mereka berharap agar rumah-rumah dapat dibersihkan dan dipulihkan sebelum tibanya bulan Ramadan yang semakin hampir, agar dapat menyambut Ramadan dalam keadaan lebih selesa dan selamat, insya-Allah.





IMPAK MISI

Antara impak positif hasil pelaksanaan misi ini ialah:

1. **Membantu meringankan beban penduduk terjejas banjir**

2. **Memberi kelegaan sementara kepada keluarga mangsa**

3. **Meningkatkan semangat dan keyakinan komuniti setempat**

4. **Mengukuhkan jaringan kerjasama kemanusiaan antara Malaysia dan Indonesia**

Misi ini diharap menjadi pemangkin kepada usaha-usaha kebajikan berterusan pada masa hadapan.



Pertubuhan Ilmu
Kebajikan Dakwah
Malaysia

JUMLAH PENERIMA MANFAAT

Agihan Selimut dan Tilam

20

Agihan Makanan dan Air Mineral

300

Agihan Air Bersih (Water Tank)

1,500

DANA TERKUMPUL RM20,078

→ **FASA 1 RM 15,000**

→ **FASA 2 RM 5,078**

Agihan Dapur Pek

20


Aktiviti Gotong-Royong Pembersihan

230

Aktiviti Mewarna, Agihan Gula-gula dan Sarung kaki

150

DANA DIGUNAKAN AGIHAN 1



DANA DIGUNAKAN AGIHAN 2

- PERLIS, MALAYSIA
- MEDAN
- ACEH UTARA
- SUMATERA UTARA

- BIREUN
- PIDIE JAYA

RM7,533.61

RM12,544.39

JUMLAH PENERIMA MANFAAT

2,220
Penerima Manfaat



Pertubuhan Ilmu
Kebajikan Dakwah
Malaysia

PENGHARGAAN KEPADA PARA PENGINFAK PIKDM

Setinggi-tinggi penghargaan dan ucapan terima kasih diucapkan kepada para penginfak budiman yang telah memberikan sokongan serta sumbangan dengan penuh keikhlasan bagi menjayakan Misi Bina Semula Harapan Aceh. Sumbangan yang disalurkan, sama ada dalam bentuk kewangan mahupun sokongan moral, amat bermakna dan menjadi asas utama kepada kelancaran perancangan serta pelaksanaan misi ini.

Keprihatinan dan rasa tanggungjawab sosial yang ditunjukkan oleh para penginfak telah memungkinkan bantuan kemanusiaan dapat disampaikan kepada komuniti yang terjejas dengan lebih tersusun, berkesan dan menyeluruh. Sesungguhnya, setiap sumbangan yang diberikan bukan sekadar bantuan material, malah membawa sinar harapan dan kekuatan baharu kepada mereka yang sedang diuji. Semoga segala kebaikan dan pengorbanan para penginfak dibalas dengan ganjaran yang berlipat ganda, dilimpahi keberkatan rezeki serta dikurniakan kesihatan dan kesejahteraan yang berpanjangan.





Pertubuhan Ilmu
Kebajikan Dakwah
Malaysia

PENGHARGAAN KEPADA RAKAN KERJASAMA & SUKARELAWAN

asar
humanity

Setinggi-tinggi penghargaan dan ucapan terima kasih dirakamkan kepada Asar Humanity atas kerjasama erat, sokongan berterusan serta komitmen yang amat membanggakan sepanjang pelaksanaan Misi Bina Semula Harapan Aceh. Penghargaan khusus ditujukan kepada Pak Noval Eriansyah (Chief Executive Officer Asar Humanity), Cik Tasya (Sukarelawan Aceh Asar Humanity), serta seluruh pasukan pengurusan Asar Humanity atas peranan penting mereka dalam memastikan kelancaran penyelarasan dan pelaksanaan misi di lapangan.

Rakaman terima kasih yang tidak terhingga juga ditujukan kepada seluruh para sukarelawan Asar Humanity yang telah menyumbangkan masa, tenaga dan khidmat bakti dengan penuh keikhlasan. Kerjasama erat antara PIKDM dan Asar Humanity, bersama sokongan padu para sukarelawan, telah membuktikan bahawa usaha kemanusiaan secara kolektif mampu memberi impak yang besar kepada komuniti yang memerlukan. Semoga segala jasa dan pengorbanan yang dicurahkan diberi ganjaran sebaik-baiknya dan menjadi amal kebajikan yang berterusan.





Pertubuhan Ilmu
Kebajikan Dakwah
Malaysia

PENGHARGAAN KEPADA RAKAN PENYUMBANG STRATEGIK



Pihak Pertubuhan Ilmu Kebajikan Dakwah Malaysia (PIKDM) merakamkan setinggi-tinggi penghargaan dan ucapan terima kasih kepada Pertubuhan Dar Maryam atas sokongan serta sumbangan yang diberikan sebagai rakan penyumbang dalam menjayakan Misi Kemanusiaan Bina Semula Harapan Aceh ini. PIKDM amat menghargai kepercayaan yang telah diberikan kepada kami untuk menggalas amanah ini serta bertindak sebagai perantara dalam mengurus dan menyalurkan bantuan kepada komuniti yang terjejas.

Kepercayaan ini merupakan satu tanggungjawab besar yang dipikul dengan penuh kesedaran, integriti dan akauntabiliti. Sokongan daripada Pertubuhan Dar Maryam bukan sahaja membantu melancarkan pelaksanaan misi, malah menjadi sumber kekuatan dan dorongan kepada PIKDM untuk memastikan setiap sumbangan dimanfaatkan sebaiknya serta disampaikan kepada golongan yang benar-benar memerlukan. PIKDM komited untuk terus melaksanakan amanah kebajikan ini dengan penuh profesionalisme, ihsan dan ketelusan demi memberi impak yang berpanjangan kepada masyarakat.





Pertubuhan Ilmu
Kebajikan Dakwah
Malaysia

PENUTUP



PIKDM merakamkan setinggi-tinggi kesyukuran kerana diberi peluang untuk melaksanakan amanah kemanusiaan ini. Diharapkan segala usaha dan sumbangan yang diberikan dapat memberi manfaat berpanjangan kepada komuniti terjejas serta menjadi amal kebajikan yang berterusan. Semoga misi ini menjadi langkah kecil yang membawa harapan besar buat mereka yang sedang diuji.

